

議有素但中朝亦有防禁公私貿易量數略定且上京胡人以馬匹進獻古有其法而胡人愛惜馬匹代以貂皮其來已久強之則不無生怨之弊今邊將開諭如有願納者則受之無妨且接戰之時不以首級論功深為有理但計級論賞自古為然不可立法在主將臨戰處之得宜傳曰皆如啓○夜南方如火氣

戊子

上御夜對

庚寅

上召對

十二月辛卯朔自辰時至巳時四方沉霧平安道安州地震清洪道天安等官雷動聲如放炮

壬辰憲府啓曰職任邊圉防守之責者或寇未至而先遁或望風而奔潰以軍律繩之罪在不赦而只從末減何以警後日將士之棄城偷生者乎李希孫不為守禦之計望敵先潰崔潁賊未入境徑為自保之計率妾先逃此而不治何以示法至如趙安國金贊或逗遛不進或望敵不援俱有罔赦之罪得保首領亦幸矣當初禁府之配所時不置於作罪地方物情憤鬱請將